

說罪要行法

受用三水要行法

桓十

五

唐三藏法師義淨撰

准依聖教及西方現今衆僧所用之水有其
三別一時水二非時水三觸用水
言時水者謂是沙彌俗人自手濾漉觀知無

蟲午前任受而飲若大僧手觸盆羅及杓水
即不堪入口而況食用有惡觸故即如僧家
常用之水大僧豈可得觸雖大僧不觸於午
後時不合飲用然水體無觸已是俗人等觸
帶於染膩非全極淨是故須受

二非時淨水者謂大苾芻及沙彌等用意之
人並須澡豆及土屑等連腕四指咸須淨洗
無有垢膩瓦盆及羅并須新淨不與垢膩相
染者方得羅濾此水皆用銅碗銅杓灰揩去
膩始得取水若無此等可求必有染木之器

不曾與觸膩相染每日淨洗塵垢不停者通用亦得若常用水可貯在淨瓶淨瓶須是瓦非銅澡罐由其瓶內有銅青不淨不得灰揩故拔出銅釵揩拭即知淨穢然銅以灰揩爲淨聖教親說若澡豆洗但去食膩銅垢不除可取銅匙灰揩足爲目驗其瓦瓶水盡每須洗濯中間方盛新水然五天之地無將銅瓶爲淨瓶者一爲垢生帶觸二爲銅腥損人此之淨水時與非時任情取飲是佛別開以其淨故更不勞受若苾芻在非時中煎藥煮茶

作蜜漿等皆用此水不得用前時水以有過故然用鐺杓碗器皆須離食染並悉灰揩方合煮物其淨水盆瓶宜於淨處安置瓮須淨物覆蓋瓶即置在竹籠不得輒令觸欲用水時先淨洗手或用乾牛糞淨揩手已無膩方觸或以淨絹布及葉用替瓶咽然後方捉律云除水及楊枝者謂此清淨之水非是餘二楊枝若是新條濕者應須火淨受而嚼故知不可直執戒文凡欲以水入口若飲若漱口與非時皆須澡豆淨洗手洗淨兩脣漱口再

三方合飲水喫食亦然又中食了時若恐淨瓶水少須令俗人授前時水嚼齒木澡漱已然口津未得輒咽要須以此淨水三嗽口已方是清淨得咽口津目見西方南海僧衆共行此法又此方古德律師有知斯事然行之者希若不如是餘膩不除咽咽得罪亦不成齋

三觸用水者但使無蟲不論淨觸即得受用謂添觸瓶向大小便處及洗手足更餘用不得輒將入口況食用耶此等三水觀知無蟲

乃至明相未出已來皆隨事得用明相既出即便不合無問多少乃至瓶內一抄盆中一合悉須銅蓋明目觀察若無蟲者雖經多日任用無犯西方僧徒及俗人五戒以爲急若外方客僧不解此水淨觸法者無容入寺又復西方寺法若見有僧將淨瓶上廁飲觸瓶水者以爲滅法即擯出寺以此言之冀諸行人共爲存護今佛法久住若能依法行者即是與佛在世無有異也

又舊律十誦五十九云有淨澡罐廁澡罐四

十一云有淨水瓶常水瓶又新譯有部律文淨瓶觸器極分明此並金口親言非是人造寧容唯一銅瓶不分淨觸雖同告語不齒在心豈可以習俗生常故違聖教准如此理諸寺房中及行方等處所有用水非常狼藉或大盆貯或甕子盛安瓶內皆不合用以是大僧手觸不好羅縹經宿不觀停貯多時定有生命設使無蟲當第三水飲用得罪謂由盆羅及杓是不淨手觸有不淨塵故又如尋常用水銅瓶若自取飲者以其不淨不受而飲

「有不受罪若中前觸至過午飲增觸罪若今日觸明日飲有宿觸罪不受而捉有惡觸罪不淨洗手復有汚手捉飲器罪不淨洗脣口飲水有不淨罪此之六罪各有方便成十二罪皆有不敬聖教罪此有因本復二十四添前成三十六罪經宿覆藏復有因本成七十二添前有一百八罪此等若其不學皆有不學無知二罪復有因本成四百三十二罪添前總成五百四十罪又復從覆藏已下及不學無知皆有不敬教方便根本更有一千八

罪添前五百四十總有一千五百四十罪此
等略據一咽一宿生罪多少若論十咽經宿
罪有一萬五千四百八十若多時覆藏展轉
生罪乃至未懺已來莫知其數重者咸須對
清淨人說悔若先知者無無知罪若非時飲
鹽湯及蜜漿等如十鎗杓椀器用水羅濾不能如
法或帶膩觸與時食相霑手口不淨不仰手
受咸悉有罪然杏子茶湯西方不飲若寺內
皆須親自檢看必在俗家細問知其淨不若
不如法即不可飲豈以口腹暫時所須而當

來長受辛苦共知毘羅鉢龍故損一葉現今
未脫不記了時況此常爲能無業道身吞一
咽罪乃無邊負擔終身誠可悲矣故經云勿
輕小過以爲無殃又曰善護浮囊防其微隙
大乘小乘意皆同此略陳要行餘如大律願
諸行者准聖教行

受用三水要行法